

contra eum afferri solent. Postremo rem omnem concludit his verbis n.  
6.: *Hæc sunt præcipua rationum momenta, quæ in utramque partem adducuntur, neque Apostolica Sedes priori opinioni, etsi minus congrueret videatur Sixtine constitutioni, ullam hactenus censuram inussit, à qua proinde etiam infligenda debet Episcopus abstinere; ad usum vero quod attinet, tuto poterit contractum trinum, quem etiam ejusdem prætronii periculosum facientur, pro viribus impedire, atque ab eo ineundo suos subditos dehortari.*

(2) Quid vero si evidenter constet, debitorem invitum, ac necessitate coactum cum iis pactionibus pecuniam accipere debuisse, quoniam sine iis alter nullo modo pecuniam credidisset? Tunc contractum usuræ labi infectum esse, tradit Carolus Gagliardus *Inst. Canonic.* l. 4. tit. 17. §. 112.

§. XXXVI. Reliquæ sunt poenæ in eos, qui usuras exercent, Ecclesiæ legibus constitutæ. Ergo criminis usurarum rei, quos nimirum in eo cœno jacere manifesto constat, infames fiunt (1); quæ tamen infamia ex usu, & canonica æquitate tollitur, si resipiscant; & irregulares propter contractam infamiam (2), & intestabiles (3), ita ut eorum, si quæ scripta reliquerunt, testamenta non valeant. Moniti ut redeant ad bonam mentem, si pervicaces fuerint, clerici ab ecclesiastico officio, & beneficio deponuntur, laici excommunicantur (4), ac male parta restituere detrectantibus absolutio sacramentalis, Eucharistia, & ecclesiastica sepultura denegatur (5), & clericus, qui hos homines se pelivit, statim in excommunicationem indicit (6). Sunt & aliæ populorum moribus, ac legibus inductæ poenæ, & judex suo arbitrio aut lenioribus utitur, aut asperioribus, uti rerum ratio postulare videtur.

(1) *Can. 2. §. Porro Caus. 3. qu. 7., C. 11. de Excess. Prælat., L. 20. Cod. Ex quib. caus. i. fam. irrog.*

(2) *Can. 2. dist. 33., Can. 8. dist. 46., Can. 4. dist. 47.*

(3) *Can. de Usur.*

(4) *C. 7. eod.*

(5) *C. 3. de Usur., c. 2. ed. in 6.*

(6) *Clement. 1. de Sepultur.*

§. XXXVII. Constat autem manifesto, aliquem esse hujus criminis reum vel ex facti evidentia, quia palam im-

probum foenus exercet, vel ex propria confessione in jure emissa, vel ex idoneis, ac fide dignis testibus, vel ex violentis indiciis, librisve rationum, quos reus edere cogitur, ut vel crimen appareat, vel ejus suspicio removeatur (1).

(1) *C. 15. de Usur., Clem. unic. §. Ceterum eod., L. 5. & 6. Cod. de Probat.*

## TITULUS XVII.

### *De poenis, & censuris ecclesiasticis.*

- |   |   |
|---|---|
| I. Ecclesia jus habet infligendi poenæ. | III. Poenæ corporales ab Ecclesia inflictæ. |
| II. Distinctio poenarum, & censurarum.  | IV. Poenæ spirituales.                      |
|   | V. Depositio, & degradatio.                 |

### §. I.

Ecclesiam habere jus infligendarum poenarum, & eam semper, quoties opus fuit, jus ipsum exercuisse, superiori loco demonstratum est. Sane hominum societas est Ecclesia, & regimen habet à Christo institutum. Ergo jus cognendi homines, qui hac societate continentur, habeat necesse est, cum nullum sine eo jure sit verum, & perfectum regimen; & vero Christus jus ipsum in eam contulit nominatim, dum ei claves dedit, quibus solveret, & ligaret, atque in sontes animadverteret (1).

(1) *Matthæus XVIII. 15. seq. Quare divinæ institutioni adversantur Pæfphus, Bohemerus, & ceteri Protestantes, qui nullam à Christo jurisdictionem, & nullum sacrum imperium Ecclesiam habuisse contendunt & poenas ecclesiasticas initio non veras poenæ fuisse existimant, sed potius ex pacto, & conventu pendentes, quoniam Christiani in societatem convenientes sese pactis adstringebant ad illius leges observandas, atque ad eos, qui his legibus non parerent, jure fraternitatis, & officio privandos.*

§. II. Ecclesiasticarum poenarum omnium est finis unus, curare videlicet, ut reus criminis emendetur, & ceteri Tom. IV.

exemplō pœnæ in officio contineantur. Sed non una est eārumdem poenarum ratio; sicuti non unum forum, neque una Ecclesiæ potestas est. Ei nimis duplex est forum internum, atque externum, & duplex item potestas, altera, quam ipsa habet communem cum omni vera, ac perfecta republica, & altera spiritualis, quæ ejus tantum est propria, quoniam ei uni à Christo data est. Itaque jure vere, perfectæque, reipublicæ pœnas, quæ corpus, & jure spiritualis potestatis pœnas irrogat, quæ animum affligunt. Quæ ad corpus pertinent, proprio nomine dicuntur pœnæ, quæ animum attingunt, censuræ appellantur (1).

(1) Inter ecclesiasticas pœnas, atque censuras nullum initio discriminis fuisse, cunctasque Ecclesiæ pœnas fuisse tantum spirituales, quæ animum solum affligeant, non corpus castigant, præter ceteros, putant Van Espenius *Jus Eccles. univers. par. 3. c. 1. n. 2. & seq.*, Petrus de Marca *Collect. canon. c. 8. n. 6.*, Cavallarius *Inst. Jur. Can. par. 3. c. 34. §. 2. seq.*, Selvagius *Antiquit. eccles. l. 4. c. 1. §. 2. seq.* Eadem est sententia Joannis Morini, & ceterorum, qui Ecclesiam tantum internum, non item externum forum habuisse contendunt. Nam si tantum interni fisi potestatem Ecclesia concedimus, consequens est, ut ea jus tantum habeat infligendarum poenarum, quæ animum affligunt, nullam vero in repugnantes externam vim adhibere possit. Sed satis est demonstratum *l. 3. tit. 1. §. 7. & seq. p. 9. & seq.*, Ecclesiam semper habuisse non internum modo, sed etiam externum forum, itemque habuisse potestatem, qua invitos, & repugnantes ad parendum cogeret; idque etiam præstiti *l. 4. tit. 1. §. 2. not. 3. p. 5. & seq.*, ubi præterea dedi Joannis XXII. constitutionem editam adversus Marsiliu Patavinum. Ex quo efficitur, ut ei semper jus fuerit irrogandi pœnas, quæ animum, & quæ corpus attingerent. Nam ista sic reciprocantur, ut si Ecclesia tantum internum forum habuit, solum animis imperaverit, si utrumque habuit internum, externumque forum, tum in animum, tum in corpus pœnas constitueret, & vim, quam coactivam dicimus, adhibere potuerit. Sane temporales, & corpus afficienes pœnas sunt mulcta pecunaria, flagella, carcer, exilium, ceteræ generis ejusdem. Atqui has pœnas semper ab Ecclesia inflictas fuisse, inter omnes constat, idque à me demonstratum est *l. 4. tit. 1. §. 10. p. 20. & seq.* Ac magnum semper Ecclesia discriminis constituit inter corporales, & spirituales pœnas, quas illis graviores habuit. Synodus Agathensis *Can. 41. Concil. t. 5. col. 530. Collect. Labbæi*: quem (clericum) inquit, ebrium fuisse constituerit, ut ordo patitur, aut triginta diuum spatio à communione statuimus submovendum, aut corporali subdendum supplicio. Ex hoc Agathensis concilii canone manifestum est, Ecclesiam incriminosum clericum utramque constituisse pœnatum.

nam, & spiritualem, qualis est ejectio à communione per tringinta dies, & temporalem, cuiusmodi est *corporale supplicium*; & vero utramque hanc pœnam non in interno, sed in externo foro irrogasse. Nam ea plectit clericum, cuius crimen non in foro poenitentia soli sacerdoti notum esset, sed imo quod omnibus esset exploratum, clericum nimis, quem ebrium fuisse constituerit. Eadem est sententia Concilii Venetici *Can. 6. t. 5. col. 8.*, & eadem similiter Concilii Matisconensis *I. Can. 5. t. 6. col. 659.*, à quo etiam numerantur ictus, quos clericus criminosis accipere debet. Synodus quoque Epaonensis *Can. 15. t. 5. col. 713.*, utramque pœnam discriminat, & spiritualem, quam in minorem clericum plecti jubet, & temporalem, quam in maiorem clericum constituit. Si Superioris loci clericus, inquit, heretici cuiuscumque clerici concilio interfuerit, anni spatio pacem ecclesiae non habebit. Quod minores clerici si præsumpserint, vapulabunt. Par est ratio Concilii Turonensis *II.*, à quo *Can. 19. t. 6. col. 540.* fustigationis pœna plectitur negligentia minoris clerici, Presbyteri autem negligentia privatione communionis per dies tringinta. Quo in loco animavertendum est, hanc pœnam imponi non propter peccatum, quod esset ad forum poenitentia deferendum, sed propter patentem cunctis negligentiam clerici, qui spreta synodi lege septimanam facere distulerat cum alio clero, quem eadem Synodus vitæ Archipresbyteri testem esse voluerat. Sic quoque Concilium Narbonense *an. 589. Can. 1. t. 6. col. 726.* clericum, qui purpureis uteatur vestibus, velut transgressorum legis coercendum statuit, unde intelligimus, quæ vis esset legis ecclesiastice, cuius transgressores pœnis coercendi erant. Idemque Concilium *Can. 13. col. 708.* statuit, Subdiaconos desides verbis corripiendos, aut stipendio privandos, reliquos vero clericos flagris coercendos. Quin etiam Abbates propter jus, & potestatem, quam habebant in subditos suos, hoc est monachos, in eos tum spiritualibus, tum temporalibus animadvertebant pœnis, neque illis utebantur, nisi flagitium asperiori pœna coercendum videretur. Hinc Socrates *Histor. l. 4. c. 23. p. 238. ed. Cantabrig. 1720.* de Arsenio Abbatे Ægyptio narrat, eum grandiores etate monachos, non item juniores propter crimen à communione separasse; quoniam ajebat, hos propter excommunicationem contumaces fieri, illos autem ejus metu, & dolore facile resipere. Idem quoque sanctum est in regula Isidori Hispalensis *c. 17.* apud Holstenium *Cod. Régul. t. 1. p. 193. ed. Augustæ Vindelic. 1759.* ubi habentur hæc: in minori etate constituti non sunt coercendi sententia excommunicationis, sed pro quantitate negligentia congruis emendandi sunt plagiis. Eadem occurunt in regula Macarii *c. 15.* apud eundem Holstenium, in regula Benedicti *c. 70. ib. p. 135.*, in regula Aurelianæ *C. 41. ib. p. 151.*, eodemque referenda sunt ea, quæ de disciplina maximæ Ecclesiæ in monte Nittiæ tradit Palladius *Histor. Lansiæ. c. 6. p. 908. in Biblioth. PP. Græco-Lat. to. 2. ed. Ducæi Paris. 1624.* His quidem pœnis, quæ corpus crueabant, hoc sibi Abbates propositum habebant, ut monachi criminosi emendantur. Sed hic idem finis est om-

nium ecclesiasticarum poenarum, quæ sotis emendationem, ceterorumque exemplum respiciunt. Interim ex eo constat, antiquis Ecclesiæ Patribus ita certum, & exploratum fuisse ecclesiasticos Prælatos jus habere infligendi poenas spirituales, & corporales, ut etiam Abbates Regulares utrasque constituerint propter potestatem, quam habebant in monachos, quibus præsidebant. Falsus igitur est Van-Espenius, qui Ecclesiam tantum spirituales poenas irrogasse, easque meras fuisse censuras, quæ animum affligeant, quique ante evulgatam, ut ipse inquit *par. 3. tit. 11. n. 2.*, & *recept. in Isidorianam collectionem Ecclesiam nec pénis pecuniariis, nec corporis afflictivis in vindictam criminum, aut adversus suorum decretorum violatores usam fuisse contendit.* Quid? An pecuniariæ poenæ numero habenda non est ea, quam Marcioni Eleutherium Pontificem altero Ecclesiæ sæculo influisse scribit Tertullianus *l. de Præcrip. hæreticor. c. 30. p. 212. ed. Ven. 1744.* An exilii loco habendum non est ejici ex Ecclesia, ac relegari? Tertullianus *ib.* De Cerdone confer Irenæum *l. 3. Contr. hæres. c. 4. n. 3. opp. t. 1. p. 178. & 179. ed. Ven. 1734.* De Pactione Schismaticorum vide S. Cyprianum *Ep. 59. ad Cornelium p. 259. ed. Amsteledam 1700. & p. 260. seq.* Age vero dejici de gradu, temporariæ poenæ loco habendum non est? At eo sunt. jure usi Episcopi III. sæculo, qua de re consuli poterit Cyprianus *Ep. 67. ad Plices Legionis, Asturic. &c. p. 289., & Ep. 68. ad Stephanum Papam p. 292. seq.* An non poenæ corporis afflictivæ erant fustigationes, carcer, exilium, similes, quibus omnibus Ecclesia usa est, multo ante quam Isidorianæ Decretales in manus hominum pervenirent? Eodem cum Van-Espenio ponendi sunt loco Cavallarius, & ceteri, qui cum eo sentiunt. Ex his autem, quæ supra dixi, manifestum est etiam, quam immerito à quibusdam reprehendatur Innocentius III., quasi ipse rem novam invenerit in *cap. 20. de Verb. signific.*, cum respondit, censuras esse tantum tres excommunicationem, suspensionem, & interdictum. Non enim ipse primus censuras à poenis distinxit, quæ quidem distinctio ab antiquissimis usque temporibus semper in Ecclesia agnita, atque probata fuerat; sed tres illas numeravit censurarum species, seu poenæ, quæ proprio nomine censuræ appellantur.

**§. III.** Corporales poenæ, quas ab antiquissimis usque temporibus Ecclesiam adhibuisse constat, præcipue sunt ictus fustium, aut flagellorum, detrusio in monasterium, aut in carcerem (1), exilium (2), mulcta pecuniaria (3). Ac de isto quidem postremo genere poenæ cavendum est diligenter, ut omnis procul absit turpis quæstus, & avaritiae suspicio, cum rei criminum pecuniariæ poenæ subjiciuntur (4). Itaque huic quidem poenæ locus esse non debet, cum ratio, ac natura criminis spiritualem postulat (5);

& cum ipsa infligitur poena pecuniaria, non in Episcopi, aut aliis ecclesiastici judicis commodum, atque utilitatem convertenda, sed piis locis adscribenda est (6).

(1) Consule quæ dicta sunt *l. 3. tit. 1. §. 21. not. 1. & l. 4. tit. 1. §. 10. not. 4.* Apud Sozomenum *Histor. eccl. l. 2. c. 5. p. 72. ed. Taurini 1747.* memorantur vincula, quibus S. Athanasius Ischyronem Presbyterum detinuisse ferebatur, Siricius P. Ep. 1. c. 6. apud Coustantium col. 629. monachos, & moniales, à quibus crimen in castitatem admisum fuerit, in ergastulis includi jubet, & Concilium Toletanum II. c. 6. apud Labbæum t. 7. col. 566. perpetuo etiam damnationis ergastulo retineri vult Presbyterum, qui causam sanguinis agitaverit.

(2) Potestatem habetis, inquit Carosus Monachus *act. 4. Concil. Chalcedonen.* apud Labbæum t. 4. col. 1422. Episcopi estis: vultis in exilium mittere, vultis damnare? Quidquid vultis suscipio à vobis. Vide *l. 4. tit. 1. §. 10. not. 1.*

(3) In Comitiis Tridentinis cum Regis Catholici Oratores quererentur, sicuti ex actis Concilii in arce S. Angeli servatis constare testatur Fagnanus in *C. Licet de pénis n. ult.*, quod Episcopi nimia facilitate in laicos censuras ferrent, huic rei consultum est à Concilii Patribus, dicta lege, ut judices ecclesiastici ad continentos in officio subditos primum alias poenas experirentur, antequam censuras infligerent. Nam *Sess. 25. c. 3. de Reform. sancitum est*, ut iidem judices, quandocunque executio realis, vel personalis in qualibet parte judicij propria auctoritate ab ipsis fieri poterit, abstineant se à censuris, seu interdicto; sed liceat eis contra quoscunque etiam laicos per multas pecuniarias.... seu per captionem pignorum, personarumque distinctionem per suos proprios, aut alienos executores faciendam, sive etiam per privationem beneficiorum, aliqua juris remediis procedere, & causas definire. Quod si executio realis, vel personalis adversus reos hac ratione fieri non poterit, sitque erga judicem contumacia, tunc eos etiam anathematis mucrone arbitrio suo, præter alias poenas, ferire poterit. Ex quo manifestum est, Tridentinam Synodus agnoscere, & confirmasse potestatem, quam habent Judices ecclesiastici, corporales poenas infligendi.

(4) *Cap. 13. de Offic. ordin. cap. 3. de Pénis.*

(5) Confer Glossam in *c. 3. de Pénis*, ibique etiam Fagnanum n. 37, & Covarruviam *Var. resol. l. 2. c. 9. n. 9.*

(6) Concilium Tridentinum *Sess. 23. c. 1., & Sess. 25. c. 3. de Reform.*

**§. IV.** Graviores sunt poenæ spirituales, quæ proprie censuræ dicuntur, & quarum triplex est genus, excommunicatio, suspensio, interdictum. Omnibus his poenis Eccle-

sia non criminosi interitum quærerit, neque illatas Reipublicæ injurias ulciscitur, quo poenæ civilis Potestatis intendunt. Tantum illa curat, ut reus criminis emendetur, & ceteri exemplo poenæ sese à criminibus abstineant; ideo procul habet poenam sanguinis (1), & in poenis, quas infligit, modum quemdam, & rationem adhibet, ut levioribus criminibus leviores, gravioribus autem graviores poenas constituat. Ita excommunicatione, per quam aliquis à Christiana republica excluditur, non multat eum; qui propter levius crimen dignus quidem est, qui in exilium abeat, hoc est, qui ex una civitate, aut regione, non vero ex universa Christiana societate expellatur.

(1) Consule Joannis XXII. constitutionem adversus Marsiliū Patavinum, & Joannem Jandunum, cuius supra facta mentio est.

§. V. Inter ecclesiasticas poenas recensentur etiam depositio, & degradatio; sed nos hanc tractationem primo libro occupavimus. Itaque omnis nostra nunc erit de ecclesiasticis censuris disputatio.

## TITULUS XVIII.

### *De excommunicatione.*

I. Censura quid?

II. Divisio censurarum.

III. Potestas excommunicandi à Christo Ecclesiae data.

IV. Excommunicatio mortalis, & medicinalis.

V. In quos medicinalis excommunicatione ferebatur?

VI. In quos excommunicatio mortalis?

VII. Major, minorque excommunicatione, & anathema.

VIII. Excommunicatio lata vel ferenda sententia.

IX. Effectus excommunicationis ma-

joris.

X. Excommunicatus vitandus.

XI. An hæretici, schismatici, similes vitandi sint?

XII. Summus Pontifex, & Episcopi censuras ferunt.

XIII. In quos feratur excommunicatione, & quomodo ea ab omnibus metuenda sit?

XIV. Quibus de causa irrogetur?

XV. Præmittendæ monitiones.

XVI. Excommunicatus à suo Episcopo ubique excommunicatus habendus est.

Spirituales poenas proprio nomine censuras appellari diximus. Censura apud Romanos erat nota censoria, per quam aliquis gradu, vel dignitate movebatur. Nam quem Censores in censu, sive descriptione Senatorum, Equitum, Civium præteriissent, is infamia notatus habebatur, ac si Senator esset, à Senatu ejiciebatur, si Eques, publicum equum amittebat, denique si Plebejus, in Cæritum tabulas referebatur. Idem hoc nomen suis quoque poenis, quæ aliquem vel ex Christiana republica expellunt, vel communione precum, & Eucharistiæ, vel dignitate privant, Ecclesia accommodavit.

§. II. Dividuntur censuræ in excommunicationem, suspensionem, interdictum. Cunctis gravior est excommunicatione, quæ ipsa vi nominis eadem est, ac ejectio de corpore Ecclesiæ, vel participatione sacramentorum, atque in antiquis monumentis segregatio, abstensio, abjectio, similibusque nominibus appellatur. Quod cujusque societatis jus est, id Ecclesiæ quoque jus esse debet, ut noxios homines ejiciat. Sane non solum Hebræi gravissimi criminis reos infamia notatos è Synagoga, & communione sacrorum ejiciebat, sed etiam ethnici hoc genus hominum Diris devovebant, sive execrabant, quod nos dicimus excommunicare, eosque sacrificiis interdicebant, & civium commercio privabant (1).

(1) Insigne est, quod de Druidis Galliæ sacerdotibus narrat Cæsar *d. Bello Gallic. l. 6. c. 13. p. 299. & 300. ed. Lugdun. Batav. 1737.* S quis, inquit, privatus, aut publicus eorum decreto non steterit, sacrificiis interdicunt. Hæc pena apud eos est gravissima; quibus ita est interdictum, ii numero impiorum, ac sceleratorum habentur; iis omnes decidunt, aditum eorum, sermonemque defugunt; neque iis potentibus jus redditur, neque honos ullus communicatur.

§. III. Præceptum autem interdicendi criminosis omnem communionem, & societatem tam sacrarum, quam civilium rerum, nos ab ipso Christo accepimus (1), & à Paulo (2), qui nos cum scelestis communi mensa uti vetat, ac nullam vult esse societatem cum eo, qui Dei verbum non audit, ut pu-